


論語訓詁解

三

0712
1666
1



仁12
1.666
/



此法解序
董夫子之論古書也云必稱堯
舜漢古典也云必稱禹與湯也
六經之執存乎此者猶有焉與
詩書志之學可心觀者猶素深
以上論詩者唯多尔雅及後
世字生起出而詩并日繁矣漢



六經者但以此為微乎此古
 言孔慶夫已稱微古而不以
 文釋字者考之者未始不可也
 然波出孔聖若以原科斗字伏生
 不寫又此古字與字底之變中
 亦定更以抄字而翻之於古
 典安得無此辨哉善治語者古


典當先治者有後世治者其為
 長與科神亦正妙者門矣法
 精誅分海也美象糾紛或有法
 於理學其或由法於儒法者亦
 隨執見之至之者隨要不能
 精之於利法者亦夫初志業
 說文義也誌者乃古之也又

化友友方去文也點不謂新法
 學可報如子思有云曰學之
 之魚汝深具訓誌成學古人
 不以為典新也由下世之後讀百
 世之書之生指宗法新誌而
 和如子多深世新志是之嘉
 不揮其隨我誌子与詩古潔

法亦雅与说文与青考彙書
 新成生以教而吟吟子与學未
 熟此歌与儒若祿矣同後之
 讀志考彙以正生此性予
 牛也

天即成申為十二月

姜浩江子元志撰



[Faint handwritten text in cursive script, likely bleed-through from the reverse side of the page.]

論語訓詁解卷一

美濃 江馬元恭學

按說文曰、論者議也、語者論也、又相應答也、釋名曰、論語記孔子與弟子所語之言也、蓋記孔子平日與諸弟子議論應答之言也、故稱為論語、
文心彫龍曰、論者倫也、倫理有無、聖意不墜、昔仲尼微言、門人追記、故仰其經目、稱為論語、皇侃義疏曰、一云、倫者次也、言此書事義相生、首末相次也、二云、倫者理也、言此書之中、蘊含萬理也、三云、倫者綸也、言此書經綸今古也、四云、

倫者輪也、言此書義旨周備圓轉無窮、如車之輪也、物茂卿曰、蓋先王詩書禮樂、孔子之前、學者亦傳其義、然其言人人殊矣、至於孔子而後、論定、古者大學有乞言合語、周官大司樂有樂語、凡言之可以爲教者、皆謂之語、諸說未切當、程氏曰、論語之書、成於有子、曾子之門人、故其書獨二子以子稱、此說本柳宗元也、千百年眼曰、論語出閔子門人手、論語所記、孔子與人問答、比及門弟子、皆斥其名、未有稱字者、雖顏冉高弟、亦曰回雍、至閔子獨云子騫、終此書、無指

名、然則謂論語出於曾子、有子之門人、又安知不出於閔子之門人耶、觀所言閔子侍側之辭、與冉有子貢子路不同、亦可見矣、茂卿曰、蓋上論成於琴張、而下論成於原思、故二子獨稱名、談經曰、按曾子少夫子四十六歲、後夫子沒而篇內記其平日之語、則知是書成之日、距夫子遠矣、然亦七十子手錄、後人述之、諸說未知孰是、

學而第一

每篇採摘章普之二字以爲小目、

子曰學而時習之不亦說乎有朋自遠方來不亦樂乎人不知而不愠不亦君子乎

此章謂大學之教以漸而成也凡稱學者皆入學校而學道之謂也學記曰大學之法禁於未發之謂豫當其可之謂時註云可謂年二十成人之時也言凡從年二十之時入學校而修習所以可為悅也說悅本作兌禮記引書說命皆作兌兌卦傳兌為口老子塞其兌據此觀之則說有喜而語之意也朋說文古作鳳鳳飛群鳥從以萬數故借為朋黨言弟子自遠方來進三千與我同學講習相

資所以可為說也愠蘊菀鬱怨古皆通用詩曰我心蘊結又曰我不見兮我心菀結楊子法言曰蘊積也心所鬱積也荀子曰富有天下而無怨財註怨讀為蘊家語作無宛畜孟子內無怨女義皆同言不為人所知而我不鬱結所以為君子也學記曰古之教家有塾黨有庠術有序國有學比年入學中年考校一年視離經辨志三年視敬業樂群五年視博習親師七年視論學取友謂之小成九年知類通達強立不反謂之大成夫然後足以化民易俗近者說服而遠者懷之此大學之道也

憲問篇子路問君子子曰脩己以敬家語曰君子者乃人之成名也百姓與名謂之君子是成其親爲君而爲其子也

馬融曰子乃男子之通稱按後漢書有故掖庭技人哀置嫁爲男子章初妻又曰孔融魯國男子明日使當拂衣而去可見稱男子非必男女之男蓋無官爵者之通稱曰子者記者之辭曰夫子者自弟子呼之辭或單呼爲子者亦即指孔子不關通于他然亦非尊稱之辭皇侃爲子是有德之稱古者稱師爲子非也物茂卿曰子男

子美稱亦爲大夫之稱此說出於鄭玄儀禮註按鄭玄據公羊傳名不若字字不若子之語即以子爲五等爵之子又曰人無不有父者不德爲不肖爲不肖其父也學成德而爵爲大夫亦爲肖其父也字鼎曰孔子子姓孔則氏也族也混姓與氏族秦漢以後之事爾諸說未允當王肅曰時者學者以時誦習也誦習以時學無廢業所以爲悅懌邢疏引王制云春夏學詩樂秋冬學書禮又文王世子云春誦復弦秋學禮冬讀書茂卿引之朱熹曰既學而又時時習之

則所學者熟而中心喜悅其進自不能已矣諸說皆非何晏謂愠怒也亦非

有子曰其爲人也孝弟而好犯上者鮮矣不好犯上而好作亂者未之有也君子務本本立而道生孝弟也者其爲仁之本與

此章乃仁之訓也其爲人之人與爲仁之仁相照爾雅曰善父母曰孝善兄弟曰弟犯說文侵也鮮爾雅罕也寡也本者本末之本言爲人之道以事親從兄而爲本也知所以事親從兄則知所以事君也知所以事君而好犯上作亂者未之有也大

學曰君子不出家而成教於國孝者所以事君也弟者所以事長也慈者所以使衆也君子以孝弟爲本而務行之則爲人之道自生是以孝弟也者爲仁之本也儀禮曰孝弟忠順之行立而后可以爲人可以爲人而后可以治人也孟子曰仁之實事親是也義之實從兄是也又曰親親仁也敬長義也無他達之天下也孝經子曰君子之事親孝故忠可移於君事兄悌故順可移於長居家理故治可移於官是以行成於內而名立於後世矣中庸子曰仁者人也親親爲大孟子曰仁也者人

也合而言之道也仁偏旁作二二古上字見正字
通人能知人之所以爲人之道則出於萬人之上
所謂仁也仁之德莫尚焉據此觀之仁者爲人道
之總稱孝弟忠信禮義恭敬皆存於仁中矣
朱熹曰仁者愛之理心之德也物茂卿曰仁者謂長
人安民之德也二說皆臆斷而已茂卿曰君子
務本本立而道生蓋古語有子引之茂卿每取
其意之所應動輒云從某至某古言從某至某
孔子釋之無所徵諸古則是一人私言也豈足
信哉

子曰巧言令色鮮矣仁

巧言令色見尚書巧者拙之反令爾雅善也令人
令聞令望皆同言辭顏色務致飾於外欲令人說
之也如此之人有孝弟忠順之行立能知爲人之
道者寡矣皇侃本仁上有有字

曾子曰吾日三省吾身爲人謀而不忠乎與朋友交
而不信乎傳不習乎

曾子言吾生平戒慎於一日中每以此三者省吾
身有過否也爲他人謀事而不盡中心乎與朋友
交言而不爲信乎習重也易習坎重險也老子習

常又作襲常襲習通重也大禹謨卜不習吉是也
言人以事卽我詢謀以枚卜我卜不重吉而苟且
傳之乎此句係于謀而忠與言而信之二事皇本
交下有言字以與朋友交言而有信之語而考之
則其脫可知矣
忠說文從心中聲按又與中衷通國語曰考中度
衷忠也子曰言忠信行篤敬孟子曰教人以善謂
之忠

信說文徐鍇曰於文人言爲信言而不信非爲人
也子路篇子曰言必信穀梁傳曰人之所以爲人

者言也人而不能言何以爲言信之所以爲信者
道也據言思忠言忠信與人交言而有信等之語
以考之則忠信二字係于言語忠者言出於心中
信者與人交言而不爽之義也

藤維楨曰三省如三復三令之數丁寧反復而
省其身也凡三字在句首者爲三次之義在句
尾者爲數目之義按三省下有三件則極指此
三事而言三讓之三指三人宜照察焉不可必
作再重之義也何晏曰凡所傳之事得無素不
講習而傳之乎豈有省素不講習者而傳之之

理哉

子曰道千乘之國敬事而信節用而愛人使民以時道中庸曰道自道也楊子法言曰道也者通也無不通也又曰夫道以導之釋名曰道導也所以道導萬物也詩所謂中冓之言不可道也謂不可使閨門之言而通導之也千乘之國者大國也采地方百里者出千乘是先王斑爵之制也坊記曰制國不過千乘都城不過百雉是也蓋夫子之爲政以先王之制而謂之爾周衰已來先王之制日壞知屠戮可以辟地而不知仁義可以服民當是時

雖魯之小猶方百里者五矣况秦楚務攻伐日以致其大者乎所謂千乘之國攝乎秦楚大國之間者可知矣敬事者舉事必敬肅言必有信也敬說文肅也書洪範敬爲肅子曰貌思恭事思敬然則於貌肅供恭也於事肅敬敬也節用者省節財用不妄費也時者敬授人時也敬記天時以授人時時不順則物不成左傳曰禮以順時信以守物民生厚而德正用利而事節時順而物成王制曰凡居民量地以制邑度地以居民地邑民居必參相得也無曠土無遊民食節事時民咸安其居言若

當路則通導千乘之國必先以此三者然後可以興學矣

皇侃本道作導包咸曰道治也朱熹維楨因之非確詰物茂卿曰道如道宋衛之間之道謂使治道路也蓋以為天子巡狩小國苦供億也按孟子曰天子適諸侯曰巡狩巡狩者巡所守也諸侯朝於天子曰述職述職者述所職也無非事者春省耕而補不足秋省斂而助不給夏諺曰吾王不遊吾何以休吾王不豫吾何以助文中子叔恬曰舜一歲而巡五嶽國不費而民不勞

何也子曰無他道也兵衛少而徵求寡也夫天子巡狩各受其惠也小國何苦供億之有朱熹曰敬者主一無適之謂茂卿曰敬皆本於敬天敬鬼神二說取諸臆非確詰字鼎曰人謂官人朱子因包氏不別民與人非也自天子以至庶人通稱為人也豈止官人邪包咸曰使民必以其時不妨奪農務亦非

子曰弟子入則孝出則弟謹而信汎愛衆而親仁行有餘力則以學文

弟子者指為人之弟為人之子者也言弟子出入

事親從兄也謹說文慎也信解見上汎通作泛汎水延漫也親仁者謂篤親於家興仁於民也子曰君子篤於親則民興於仁孟子曰君子之於物也愛之而弗仁於民也仁之而弗親親親而仁民仁民而愛物太甲曰嗚呼唯天無親克敬惟親民罔常懷懷于有仁秦誓曰雖有周親不如仁人檀弓曰喪人無寶仁親以為寶宇鼎曰餘力是行之餘何得以暇日解文者謂先王遺文詩書之類也子貢曰賢賢易色事父母能竭其力事君能致其身與朋友交言而有信雖曰未學吾必謂之學矣

易音異

賢與磻通通雅蹉蹉誣誣脛脛腎腎猶磻磻履按大玄經磻磻即硜硜易難之對乃和易樂易平易輕易之易色說文顏氣也與下章色難意正同言面有愉色而為順難內則柔色以溫之曲禮君子戒慎不失色於人是也言碌碌如愚非和易我顏氣而美順則事君事父母交朋友之道皆不可也致者說文送詣也增韻極也交言猶交驩也大學之教在此三者故云如此之人雖不能夙夜匪懈吾必謂之既學之人也

孔安國曰以好色之心好賢則善朱熹曰賢人

之賢而易其好色之心好善有誠也邢疏曰上賢謂好尚之也下賢謂有德之人也易改也色女人也物茂卿曰變易顏色好賢之誠形於外也諸說淺俗與下文語意不通申矣

子曰君子不重則不威威學則不固主忠信無友不如已者過則勿憚改

此章論於學校所以教育人之法也重者嚴重也左傳曰有威而可畏謂之威學記曰君子知至學之難易知其美惡然後能博喻能博喻然後能為師能為師然後能為長能為長然後能為君故師

也者所以學為君也又曰凡學之道嚴重為難師嚴然後道尊道尊然後民知敬學又曰入學鼓篋孫其業也復楚二物收其威也以上句考之則學上恐脫不字荀子曰學也者固學一之也一出焉一入焉塗巷之人也又曰盡善挾洽之謂神萬物莫足以傾之之謂固神固之謂聖人又曰聖人者道之極也故學者所志固學將為聖人也又曰學也者固學止之也惡乎止之曰止於至足曷謂至足曰聖也大戴禮曰曾子門弟子或將之晉曰吾無知焉曾子曰何必然往矣有知焉謂之友無知

焉、謂之主、主者、猶主司、城貞子家、主顏讐由家之主、唯客之而已、說文、同志爲友、學記曰、視論學取友、謂之小成、又曰、獨學而無友、則固陋而寡聞、不如者、與吾與女、弗如之、弗如同、不及之、謂也、過者、過不及之過、於治國脩身而不得中庸之謂也、非失誤之謂也、於述而篇、詳說之、言古者學士比年入大學、而日長其材、其爲師、擊鼓警衆、學者既至、而不勤其業、師乃以夏楚二物笞撻、所謂扑作教刑是也、其爲師也、不嚴重而收其威、則不能教育學士也、主忠信之家、然後可以學禮、與不如已者

無其論其道也、而行有不得中庸之事、則當速改也、書所謂改過不吝是也、顏淵好學不貳過、古之學者可以見矣、

孔安國曰、固蔽也、言人不能敦重、既無威嚴、學又不能堅固、識其義理、朱熹曰、重厚重、輕乎外者、必不能堅乎內、故不厚重、則無威嚴、而所學亦不堅固也、人不忠信、則事皆無實、爲惡則易爲善則難、故學者必以是爲主焉、一說不得固之解也、物茂卿曰、蓋祀與戎、國之大事、其他諸大禮重事也、君子奉天道以行之、建旌旗以象日

月設百官有司以象星辰明等威以象天地不重
謂非重事也學則不固傳曰博學無方孔子無
常師謂不固守一師之說也如此說則語脈不
倫不通甚矣又曰此章君子不重則不威學則
不固是一類主忠信以下是一類孔子多誦古
言以誨門人或並引以相發或專誦以獨行維
楨曰此章一句各是一事皆切要之言也毛奇
齡曰君子不重十一字自為一章主忠信三句
自為一章此本子罕篇文而複簡于此者亦皆
語脈不倫不可取也

曾子曰慎終追遠民德歸厚矣

慎終者喪之訓追遠者祭之訓孔安國曰慎終者
喪盡其哀追遠者祭盡其敬是也晏子曰徼也者
德之歸也列子曰死也者德之徼也古者謂死人
為歸人註徼者歸也死必歸土言物盡處厚猶大
言不忽略喪祭則雖民死其德之盡厚大也

孔安國曰民化其德而皆歸於厚也諸註據之非
子禽問於子貢曰夫子至於是邦也必聞其政求之
與抑與之與子貢曰夫子溫良恭儉讓以得之夫子
之求之也其諸異乎人之求之與

子曰政者正也釋名政正也政者不翅國政秉柄
於其事皆謂之政禮大射禮爲政請射左傳疇昔
之羊子爲政今日之事我爲政是也五之字皆指
儒政也求者猶我非生而知之者好古敏以求之
之求乃謂勉學而求之也温温和猶寒煖相適也
良說文善也周禮精作爲功則曰良恭說文肅也
解見上儉說文約也左傳儉德之共也讓謙遜也
賈子新書曰欣燠可安謂之温安柔不苛謂之良
廣較自斂謂之儉厚人自薄謂之讓子禽以爲夫
子所至之邦必與聞其儒政夫子勉學而求之歟

抑天與生知之聖歟子貢曰夫子備温良恭儉讓
之仁德而得之夫子所以勉學求之者與人之勉
學求之者異也其諸助語之乎之意

鄭玄曰陳亢怪孔子所至之邦必與聞其國政
求而得之邪抑人君自願與之爲治耶諸註因
之非也按孔子見逐於齊不用於衛遇圍於匡
困於陳蔡東西無所適遇孔子亦不求仕孔子
何以所至得與聞其國政哉若求於時君而得
之所謂不由其道而往者也

子曰父在觀其志父沒觀其行三年無改於父之道

可謂孝矣

二其字與父字相應諸註爲指子而言者非也父在觀其志言父今在則觀其生平之志如何以事之也父既沒則觀其存時如何以慕之也三年無改於父之道所謂諒闇三年不言是也曾子曰吾聞諸夫子孟莊子之孝也其他可能也其不改父之臣與父之政是難能也

孔安國曰父在子不得自專故觀其志而已邢疏父若已沒則子得專行無憚故父沒則觀此子所行諸註據之皆非

有子曰禮之用和爲貴先王之道斯爲美小大由之有所不行知和而和不以禮節之亦不可行也

按禮之之字倒用法與戰國策恐一日之亡國而憂大王又曰臣恐王爲臣之投杼也史記傳天下若斯之難其例同藤維楨曰用以也禮記作禮之以和爲貴是也和者齊和調和之和有所不行四字皇疏邢疏皆屬上是也朱熹以屬下者非也言先王之道用和爲美小事大事冠昏朝聘喪祭射御雖由之有所不行禮勝則離知和和之以禮節之則何不行之有

禮釋名曰禮體也得其事體也禮器曰禮也者猶體也禮有大有小有顯有微大者不可損小者不可益顯者不可揜微者不可大也故經禮三百曲禮三千其致一也詩曰相鼠有體人而無禮人而無禮胡不遘死喪服四制曰凡禮之大體體天地法四時則陰陽順人情故謂之禮

有子曰信近於義言可復也恭近於禮遠耻辱也因不失其親亦可宗也

此章謂所以不失親疏之序也近說文附也復說文往來也爾雅反也言雖言有信不附義而行則

其言離父母之親疏君臣之道是以不可反復也管子曰人主出言不逆於民心不悖於理義其所言足以安天下者也人唯恐其不復言也出言而離父子之親疏君臣之道害天下之衆此言之不可復者也故明主不言也言貌雖恭不附禮而行之則失其恭故有近耻辱禮記曰恭而不中禮謂之給茂卿以因為姻媼古字通者是也爾雅曰壻之父為姻婦之父為婚大傳曰別子為祖繼別為宗繼禰者為小宗有百世不遷之宗有五世則遷之宗別子為祖者諸侯之庶子別為後世為始祖

者也。繼別爲宗者，謂別子之世長子爲其族人爲宗者也。族人尊之謂之大宗，繼禰者爲小宗者，謂別子庶子之長子爲其昆弟爲宗者也。百世不遷，謂大宗也。五世則遷，謂小宗也。大傳又曰：人道親親，故尊祖，尊祖故敬宗，敬宗故收族，收族故宗廟嚴。管子曰：無亂社稷宗廟，則人有所宗。白虎通曰：宗者何謂也？宗尊也，爲先祖主也，宗人之所尊也。古者所以必有宗，何也？所以長和睦也。大宗能率小宗，小宗能率群衆，通其有無，所以統理族人者也。言其於族黨而不失親疏之序，尊祖敬宗，而姻

不失其親，亦可尊宗也。皇本宗下有敬字。中庸義者宜也，尊賢爲大。禮運曰：禮也者，義之實也。協諸義而禮，祭義曰：仁者仁此者也，禮者履此者也。義者宜此者也。釋名曰：義宜也。裁制事物，使各宜也。禮運曰：何謂人義？父慈子孝，兄良弟弟，夫義婦聽，長惠幼順，君仁臣忠，十者謂之人義。凡君臣父子，夫婦兄弟，朋友長幼，使各協其宜，是其義也已。

朱熹曰：信約信也，復踐言也。約信而合其宜，則言必可踐矣。非也。孔安國曰：因親也。言所親不

失其親亦可宗敬朱熹曰因猶依也宗猶主也
 所依者不失其可親之人則亦可以宗而主之
 矣諸說未得其解茂卿據鄭註以姻為外親言
 人親外族則本宗多離今其為人能親外族而
 本親不離茂卿以因為姻是也以姻為外親者
 至宗之字而窮矣爾雅壻之父為姻婦之父為
 婚然則姻為內親明矣信近於義恭近於禮因
 不失其親此三者引古言而有子釋之乃其私
 言也

子曰君子食無求飽居無求安敏於事而慎於言就

有道而正焉可謂好學也已

物茂卿曰小人之志在溫飽君子則否是也敏說文
 疾也釋名曰敏閔也進叙無否滯之言也故汝穎
 言敏曰閔也敏速於行事而無懈惰也與欲訥於
 言而敏於行之章語意正相發有道之有猶書所
 謂有官有周有政有方之有大戴禮曰稱有何也
 有見也乃謂就有道之人而正是非也

子貢曰貧而無諂富而無驕何如子曰可也未若貧
 而樂富而好禮者也子貢曰詩曰如切如磋如琢如
 磨其斯之謂與子曰賜也始可與言詩已矣告諸往

而知來者

世本日切說文云刊也磋廣韻云磨治象牙也按說文無磋字當通作齧齧者齒不齊之名蓋以器之有齒者磨之使光朱子謂磋爲鑿盪是也琢者治玉器加功而成之名磨治石也按爾雅云象謂之鵠角謂之鬻犀謂之削木謂之剝玉謂之雕金謂之鏤木謂之刻骨謂之切象謂之磋玉謂之琢石謂之磨象言鵠又言磋玉言雕又言琢者爾雅疏曰鵠鬻削剝雕皆物未成而治其璞也鏤刻切磋琢磨皆物已成而復治之也朱子謂治骨角者

既切復磋治玉石者既琢復磨似無據郭璞云骨角須切磋而爲器人須學問以成德玉石之被琢磨猶人自修飾也又荀子云人之於文學也猶玉之於琢磨也詩曰如切如磋如琢如磨謂學問也蓋貧而樂道富而好禮非有切磋琢磨之工夫而脩其學則不能以能之故大學如切如磋者道學也如琢如磨者自修也回也其庶乎屢空賜也不受命而貨殖焉億則屢中貧而樂道富而好禮之義也子貢既悟富貴而知好禮則不驕不淫貧賤而知好禮則志不懾之義引詩以實之是以夫子

曰賜也始可與言詩已矣禮尚往來告子貢以貧富動靜不失節往而知來之理者也皇侃本及石經樂下有道字皇本來者下有也字
茂卿曰以政刑治民猶足能使民貧而無諂富而無驕矣至於以禮樂治民而後能使民貧而好樂富而好禮焉是治之至者也此說失本旨矣

子曰不患人之不己知患不知人也

此章乃是知之訓也王肅曰但患己之無能知也家語曰智者知人又曰知莫難於知人書曰知人

則哲能官人是也皇侃本不知人上有己字

論語訓詁解卷一終

皇朝本不啖人土官日字

論語訓詁解卷二

美濃 江馬元恭學

子曰為政以德譬如北辰居其所而眾星共之

此章論大射之義也儀禮大射禮曰司射適次袒決遂執弓挾乘矢於弓外見鏃於弣右巨指鉤弦自阼階前曰為政請射註司射射人也為政謂司馬也司馬政官主射禮又曰司射入于次摺三挾一介出于次西面揖當階北面揖及階升堂揖當物北面揖及物揖由下物少退誘射射三侯將乘

矢始射于又射參大侯再發卒射北面揖又曰天子以備官為節諸侯以時會天子為節卿大夫以循法為節士以不失職為節故明乎其節之志以不失其事則功成而德行立德行立則無暴亂之偶矣功成則國安故曰射者所以觀盛德也爾雅釋天云北極謂之北辰蓋行太射之儀則司馬以德行而觀之司射各北面揖譬如北辰不移動而居其所衆星運轉拱之也

此章諸註為政以德則無為而天下歸之與愚見大異

子曰詩三百一言以蔽之曰思無邪

蔽爾雅微也疏云覆障使微也邢疏曰古者謂一句為一言思無邪者詩之一言魯頌駟篇之辭世本云凡作詩之人皆以無邪之思發之而為詩故其所美者足以感發人之善心其所刺者足以懲創人之逸志雖似好色而不淫雖似怨誹而不怨是皆孔子所亟錄也言雖詩三百篇之多其所美者其所刺者皆以無邪之思發之是以此一句唯是使詩三百篇而覆掩其志也物茂卿曰司馬遷詩三千孔子刪之為三百然據論語則孔子時亦唯

三百耳、曰刪者蓋孔子潤色其字句耳、此說是也、池北偶談曰、孔子但正樂、使各得其所而已、未嘗刪詩、觀自衛返魯云云可見、且一則曰詩三百、再則曰誦詩三百、家語對哀公問郊、亦曰臣聞誦詩三百、不可以一獻、知古詩本來有三百篇、非孔氏自刪定也、又左傳、列國卿大夫、燕饗賦詩、率皆三百篇中之詩、多在孔子之前、其非夫子手刪、了然可見、葉水心習學記言云、史記言古詩三千、孔安國亦刪詩爲三百篇、按詩周及諸侯用爲樂章、今載於左氏者、皆史官先所采定、就有逸詩、殊少矣、

不待孔子而後刪十取一也、論語稱詩三百、本謂古人已具之、詩不應指其自刪者言之也、輔廣亦謂、司馬遷言古詩三千、傳聞之誤、其說與予見略同、

包咸以蔽爲當、韓愈以蔽爲斷、皆非、包咸曰、歸於正、皇疏曰、詩雖二百篇之多、六義之廣、而唯用思無邪之一言、以當三百篇之理也、物茂卿曰、邪如奇衰之衰、謂務奇巧以踰先王之道也、其在詩本言魯侯之思不淫、奇邪、以致駮牝三千之盛已、字鼎曰、詩之所言、事物小大、無所不有、易

使人迷故孔子斷之爾諸說未得其解

子曰道之以政齊之以刑民免而無耻道之以德齊之以禮有耻且格

道解見學而篇朱熹曰政謂法制禁令也齊所以一之也道之而不從者有刑以一之也皇疏曰免猶脫也為政若以法制導民以刑罰齊民則民畏威苟且百方巧避求於免脫罪辟而不復知避耻故無耻也格彼古通用說文格至也引導之以德齊一之以禮則民固有所耻服從而至也按家語孔子曰聖人之治化也必刑政相參焉太上以德

教民而以禮齊之其次以政事導民以刑禁之刑不刑也化之弗變導之弗從傷義以敗俗於是乎用刑矣劓五刑必即天倫行刑罰則輕無赦刑例也側成也壹成而不可更故君子盡心焉孔叢子仲弓問古之刑教與今之刑教孔子曰古之刑省今之刑繁其為教古有禮然後有刑是以刑省今無禮以教而齊之以刑刑是以繁書曰伯夷降典折民惟刑謂先禮以教之然後繼以刑折之也夫無禮則民無耻而正之以刑故民苟免又曰孔子適衛衛將軍文子問曰吾聞魯公文氏不能聽獄

信乎孔子答曰不知其不能也夫公文氏之聽獄有罪者懼無罪者耻文子曰有罪者懼是聽之察刑之當也無罪者耻何乎孔子曰齊之以禮則民耻矣刑以止刑則民懼矣文子曰今齊之以刑刑猶弗勝何禮之齊孔子曰以禮齊民譬之於御則轡也、以刑齊民譬之於御則鞭也、執轡於此而動於彼、御之良也、無轡而用策則馬失道矣

包咸以格爲正非也、茂卿以德爲用有德之人亦非、

子曰吾十有五而志于學三十而立四十而不惑五

十而知天命六十而耳順七十而從心所欲不踰矩學記曰大學之法禁於未發之謂豫當其可之謂時註未發者謂情慾未生年十五之時可者謂年二十成人之時蓋孔子自未發之時已志入于大學將以爲君子也立說文住也謂住不行也謂知禮而立人之幹也故曰不知禮無以立也左傳曰禮人之幹也無禮無以立不惑者謂好學致知也知者不惑君子達德之一也孟子曰莫之爲而爲者天也莫之致而至者命也大戴禮曰分於道謂之命荀子曰節遇謂之命莊子曰未形者有分且

然無間謂之命言天生萬物各稟其形方圓曲直大小長短各有其分非人力所致而自至者命也子曰不知命無以爲君子也蓋知天道而後知物各率其性而後脩身以俟命矣楊子法言曰聖人耳不順乎非註曰惟正之聽言所聽不逆于物也矩爲方之器以爲法度之喻大學曰上老老而民興孝上長長而民興弟上恤孤而民不倍是以君子有絜矩之道也言孝弟之道執而行之動作不失之夫子七十而從心所欲不踰孝弟之道可謂至仁矣

道何晏曰立者有所成立也皇疏立謂所學經業成立也程氏曰立能自立於斯道也朱熹曰有以自立則守之固而無所事志矣物茂卿曰孔子之立謂學之成也諸說皆不得解矣孔安國曰知天命之終始也茂卿曰五十始衰故自此之後不可復有營爲故五十而爵不至有知天命也陋甚矣鄭玄曰耳順聞其言而知其微旨韓愈曰耳順天也當爲爾猶言如此也既知天命又如此亦非茂卿曰老後放縱人之常也孔子七十從心所欲亦放縱耳祇其不踰矩所以爲

聖人字鼎駁之曰古之君子未有老而放縱者
 老而放縱者乃小人之當耳
 孟懿子問孝子曰無違樊遲御子告之曰孟孫問孝
 於我我對曰無違樊遲曰何謂也子曰生事之以禮
 死葬之以禮祭之以禮

無違者謂不背於禮也僧玄光曰御者侍也曲禮
 曰御食於君詩行違曰設几有緯御鄭玄之論語
 解王充之問孔其義皆以樊遲御為侍御中庸曰
 事死如事生事亡如事存孝之至也蓋每事以禮
 節之則無所違逆于親也

朱熹曰無違謂不背於理茂卿曰無違者無違
 於親之心也皆非僧玄光曰朱子解御為為孔
 子御車則一時之問對為數日之論議一坐之
 考問為行路之街談可嘆

孟武伯問孝子曰父母唯其疾之憂

其字與父母相應之字與德之不脩子是之學之
 之同指其疾言孝養父母常憂父母或有罹疾病
 也藤維楨曰父母已老則侍養之日既少況一旦染
 病則雖欲為孝不可得也

馬融曰言孝子不妄為非唯有疾病然後使父

母憂耳朱熹曰言父母愛子之心無所不至唯恐其有疾病常以為憂也皆非非盡孝之義

子游問孝子曰今之孝者是謂能養至於犬馬皆能有養不敬何以別乎

今之所謂孝者是謂能以飲食供養者雖畜犬馬皆能有以養之若養父母而不敬則與養犬馬何以異乎坊記曰小人皆能養其親君子不敬何以辨禮祭義曰衆之本教曰孝其行曰養養可能也敬為難包註引孟子曰養而不愛豕畜之也愛而不敬獸畜之也

包咸曰犬以守禦馬以代勞能養人者茂卿因之非也言至於犬馬皆以其食物而養之也非犬馬能養人之義

子夏問孝子曰色難有事弟子服其勞有酒食先生饌曾是以為孝乎

色難事父母而面有愉色是為難馬融曰先生謂父兄也服服從君父之事也饌說文具食也周禮註饌謂具設之也曾增層通重也曾祖曾孫曾巢義同宇鼎引詩曾是二字為成辭是矣詩大雅文王曰咨咨女殷商曾是強禦曾是培克世本云曾說

文辭之舒也、曾是者、怪詭之辭、馬融曰、孔子喻子夏曰、服勞先食、汝謂此為孝乎、未足為孝也、承順父母顏色、乃是為孝耳、

子曰、吾與回言終日、不違如愚、退而省其私、亦足以發、回也不愚、

字鼎曰、吾與回言終日一句、不違如愚一句、以不違為順聽是矣、私者私語也、謂非進見之時也、退即孔子退而默察也、非顏子退、其字指顏淵、

孔安國曰、察其退還與二三子說釋道義發明大體、知其不愚也、茂卿從之非、

子曰、視其所以、觀其所由、察其所安、人焉廋哉、人焉廋哉、

視、說文瞻也、從見示、古與示通用、皇疏為直視、毛傳為古示字、不必然也、目、左傳、能左右之曰目、即左右扶持之義、觀、說文、諦視也、又遠視、上視曰觀、穀梁傳、常事曰視、非常曰觀、由、詩、匪由勿語、又人尚乎由行之由同、謂所當繇從者也、察、說文、作睪、覆也、祭祀必天質、明明察也、故從祭、借為監之義、賈子新書曰、纖微皆審、謂之察、安、說文、靜也、安定也、廋、廣雅、匿也、三其字指人、言迺視其所左右之

人遠觀其所當繇從者、察其所安定、則邪正發於其面、豈有所匿其情哉、荀子曰、傳曰、不知其子、視其友、不知其君、視其左右、孟子曰、存乎人者、莫良於眸子、眸子不能掩其惡、胸中正則眸子瞭焉、胸中不正則眸子眊焉、聽其言也、觀其眸子、人焉廋哉、大戴禮曰、聽其聲、處其氣、考其所爲、觀其所由、察其所安、以其前占其後、以其見占其隱、以其小占其大、此之謂視中也、

何晏曰、以用也、言視其所行用也、由經也、言觀其所經從也、朱熹曰、以爲也、爲善者爲君子、爲

惡者爲小人、由從也、事雖爲善、而意之所從來者、有未善焉、則亦不得爲君子矣、二說皆非也、茂卿曰、人焉廋哉、孟子亦言之、孟子聽訟之法、此則以察國君之道、蓋訟之道、廋其情實、國君之賢否、其臣亦廋之故也、此說極迂、

子曰、溫故而知新、可以爲師矣、

此章言古書以訓詁而讀之也、溫、何晏爲尋、是也、春秋傳尋盟、子貢曰、若可尋也、亦可寒也、註尋溫也、前盟已寒、更溫之使熱、與燂義通、故訓詁之詁、漢儒林傳、作訓故、詁古也、通古今之言、使人言也、

管子曰、聖人博聞多見、蓄道以待物、知其故、乃不惑、申公為魯故、韓嬰為韓故、皆為訓故也、言古書深奧、非由訓詁、則不可以讀焉、能溫尋古言、使今言通知、則可以為人之模範矣、

朱熹曰、故者、舊所聞、新者、今所得、物茂卿曰、蓋如典故、故實之故、凡先世所傳者、皆謂之故、二說未允、愜、

子曰、君子不器、

包咸曰、器者、各周其用、至於君子、無所不施、朱熹曰、器者、各適其用、而不能相通、成德之士、體無不

具、故用無不周、非特為一材一藝而已、文中子曰、通變之謂道、執方之謂器、又曰、通其變、天下無弊法、執其方、天下無善教、又曰、或問君子、子曰、知微知章、知柔知剛、曰、君子不器、何如、子曰、此之謂不器、

子貢問君子、子曰、先行其言而後從之、

皇疏曰、君子先有其言、而後必行、行以副所言、是行從言也、大戴禮曰、君子博學而孱守之、微言而篤行之、行必先人、言必後人、君子終身守此愜愜、又曰、且夫君子執仁立志、先行後言、千里之外皆

為兄弟

子曰君子周而不比小人比而不周

此章論君子小人用心之廣狹也詩云周邦咸喜鄭箋周徧也朱熹曰周普徧也易上彖傳比輔也下順從也周禮五家為比使之相保取其聯比而居也蓋君子之用心也溥矣雖使仁徧於天下無聯比相輔也小人之用心也隘矣雖聯比相輔無使仁徧於天下之心也

孔安國曰忠信為周阿黨為比忠信為周本諸魯語阿黨為比未知何據茂卿併為魯語疎謬

哉晉語叔向曰君子比而不別比德以贊事比也引黨以封已利已而忘君別也又曰宣子曰吾聞事君者比而不黨夫周以舉義比也舉以其私黨也左傳曰君子謂祁奚於是能舉善矣稱其讐不為諂立其子不為比舉其偏不為黨據此觀之比非阿黨之謂明矣

子曰學而不思則罔思而不學則殆殆爾雅曰迄也言學聖人之道而不考思其跡則懵然不知是非終身無所得遂不能為君子矣徒尋思而不學聖人之道則迄為小人矣詩小雅曰

弗問弗仕、勿罔君子、式夷式已、無小人殆、鄭箋曰、殆、近也、世本據大戴禮、以近為是矣、易其殆庶乎、亦訓殆為近、

按罔、懵瞽無夢、古通用、懵然惘然、茫然憮然、亦互用、皆謂昏蒙不明也、莊子伯昏瞀人、列子作伯昏無人、詩曰、視天夢夢、又曰、視爾夢夢、義皆同、

包咸解、殆為疲殆、皇侃解、罔為誣罔、茂卿據之、非確詰、

子曰、攻乎異端、斯害也已、

按楊墨亦儒者、唯同其源而異其端耳、家語政在異端乎、史記、人々異端、後漢書、袁紹客見玄、儒者競設異端、其義皆同、七修類藁曰、昨見宋儒孫奕示兒編、內有此說、其解尤明白、謂攻如攻人之惡之攻已、如末由也已之已、已止也、可謂簡而明也、言攻異端非正道者而距之、則其害當自止矣、蓋息邪說距楊墨之謂也、七經孟子已下有矣字、何晏曰、攻治也、朱註范氏曰、攻專治也、專治而欲精之、為害甚矣、句尾已字為不穩、字鼎曰、物茂卿曰、異端稽諸漢晉諸史、多謂人懷異心者、

乃多岐之謂也不通亦甚

子曰由誨女知之乎知之為知之不知為不知是知也

此章知之訓也言所知者則以為知所不知者則以為不知是之謂智也家語子曰由志之吾告汝奮於言者華奮於行者伐夫色智而有能者小人也故君子知之曰知言之要也不能曰不能行之至也言要則智行至則仁既仁且智惡不足哉七經孟子不知為不知作不知之為不知

子張學于祿子曰多聞闕疑慎言其餘則寡尤多見

闕殆慎行其餘則寡悔言寡尤行寡悔祿在其中矣

干爾雅求也祿說文福也謂求天之百祿也詩大雅豈弟君子于祿豈弟孟子經德不回非以于祿也義皆同尤與說郵通說文罪也書報以庶尤詩君子無我有尤義皆同殆說文危也悔說文恨也茂卿曰見見君子之所行聞聞君子之所言是也楊子法言曰多聞則守之以約多見則守之以卓寡聞則無約也寡見則無卓也言多聞君子之所言疑則闕之多見君子之所行危則闕之言行如此而少說悔則承天之福祿自在其中矣

鄭玄以祿為祿位朱熹以祿為仕者之奉茂卿
 曰學而于祿士子之常也故先王設穀祿之制
 孔子亦不責子張而直答以此子張亦豈不知
 世俗干祿之所為乎蓋於其心有不安者故問
 君子亦有于祿之道邪可謂善問矣諸說陋甚
 哀公問曰何為則民服孔子對曰舉直錯諸枉則民
 服舉枉錯諸直則民不服
 哀公問政孔子以知人而答之錯交也雜也詩獻
 醕交錯易八卦相錯義皆同言舉正直之人而居
 於高位交雜之於邪枉之人則民服其上故曰舜

有天下選於眾舉臯陶不仁者遠矣湯有天下選
 於眾舉伊尹不仁者遠矣
 包咸曰錯置也舉用正直之人廢置邪枉之人
 則民服其上朱熹曰錯捨置也諸眾也皆非茂
 卿據代醉篇諸為之乎是也以積材之道為喻
 者非也
 季康子問使民敬忠以勸如之何子曰臨之以莊則
 敬孝慈則忠舉善而教不能則勸
 敬忠解見上之字指民莊說文盛飾也廣韻嚴也
 乃謂容貌端嚴也慈說文愛上安下之詞賈子新

書曰親愛利子謂之慈子愛利親謂之孝皇疏曰季康子魯執政之上卿也時以潛濫故民不敬不忠不相勸獎故問言臨民以端嚴則民敬其事也使民能孝於親慈於子則民皆盡忠於上也舉用善人而教不能者則民競為勸獎也七經孟子勸上有民字

物茂卿曰奉天道以臨之是謂之莊然後孝慈春風之行也宇鼎以為不通

或謂孔子曰子奚不為政子曰書云孝乎惟孝友于兄弟施於有政是亦為政奚其為為政

書君陳篇王若曰君陳孝恭惟孝友于兄弟克施有政乎說文作孚于說文作亏爾雅曰也石經乎作于老子盜竽今本誤作盜夸字體相近于轉訛恐作乎施說文旗息徐曰旗之逶迤借以為附麗纏繞之義詩施于孫子施于條枚施于中谷施于中林左傳施及莊公義皆同言或謂孔子曰子奚不居官而為國政乎夫子引書答之曰親父母善兄弟者逶迤纏繞及諸有政則邦國自正然則是亦為仁政於家也何必居位乃為為政乎

毛奇齡曰或疑孝乎惟孝不可解閻潛丘曰此

與禮云禮乎禮漢語肆乎其肆韓愈文醇乎其
本醇相同言孝之至也故曰美大孝之詞此說非
也包咸以施為行非確詰

子曰人而無信不知其可也大車無輓小車無軌其
何以行之哉

孔安國曰言人而無信其餘終無可也包咸曰大
車牛車輓者轅端橫木以縛輓者也小車駟馬車
也軌者轅端上曲拘衡者也軌說文大車轅端持
衡者六書故轅端橫木即衡也軌孫愐曰轅端曲
木也言車無此二者則不可以行是為譬無信之

人也

子張問十世可知也子曰殷因於夏禮所損益可知
也周因於殷禮所損益可知也其或繼周者雖百世
可知也

說文三十年為一世又一代為一世又父子相代
為一世夫王者之治國也無物而不在禮矣何國
無禮何世無禮是以雖百世之遠唯禮而已是以
後來不知者惟其所損益隨世不相同而已矣故
禮記曰三代之禮一也民共由之或素或青夏造
殷因周坐尺漢書董仲舒引此章曰王者有改制

之名亡變道之實然夏上忠殷上敬周上文者所繼之棟當此用也物茂卿曰子張不問禮而孔子答以禮是聖人所前知僅禮而已且其意謂聖人損益前代之禮唯與時宜之而不知一代禮樂維持數百年之後此解極善矣皇疏曰從今以後假令或繼周而王者王王相承至於百世亦可逆知也皇本百世下有亦字

子曰非其鬼而祭之諂也見義不爲無勇也
毛奇齡曰鬼是人鬼謂人之爲鬼者專指祖考言故又曰其鬼諂說文作調省作諂諛也言非祖考

而祭之諂諛也樂記曰臨事而屢斷勇也見利而讓義也左傳曰平子伐莒取鄭獻俘始用人於亳社臧武仲在齊聞之曰周公其不饗魯祭乎周公饗義魯無義見義而祭之非祖考則屢斷而不祭則不爲無勇也不爲下不可斷句

見義不爲諸註未得其解茂卿曰此孔子有所譏而言之但未審其爲何人也未知何據

